

10 FEB, 2021

'Orang tengah kawal harga sayur'

Berita Harian, Malaysia

Page 1 of 2

'Orang tengah kawal harga sayur'

Pekebun dakwa pemborong, penjual kaut untung besar

Oleh Fahmy A Rosli
fahmy.azril@bh.com.my

Kuala Lumpur: Walaupun harga sayur di pasaran dikatakan melonjak tinggi, ia cuma menguntungkan 'orang tengah' dan bukannya pekebun secara keseluruhan.

Beberapa pekebun sayur tanah rendah mendakwa pihak pemborong termasuk penjual adalah golongan yang 'ada kuasa' untuk mengawal harga di pasaran tempatan, terutama di pasar borong.

Pekebun sayur tanah rendah di Hulu Selangor, Ramli Mohd Nasir, berkata harga sayur yang dijual terus kepada pemborong meskipun dalam tempoh pelaksanaan Perintah Kawalan Pergerakan (PKP) lebih kurang sama pada waktu kebiasaan.

Walhal, katanya, harga sayur yang dijual kepada pemborong jatuh dan bukannya naik mendadak kerana kekurangan permintaan berikutan pelaksanaan PKP ketat sehingga restoran, pasar tani dan pasar malam dihadkan beroperasi.

"Yang naikkan harga bukan di pihak ladang, ini kerja orang tengah seperti pemborong. Mereka yang naik dan kawal harga sehingga dijual kepada pengguna."

"Walaupun harga naik sekalipun, kami kena ikut harga sampai habis tempoh kontrak. Pekebun seperti kami terhimpit, tetapi di sebelah pemborong dan penjual, paling untung."

"Harga sayur tak naik mendadak kalau beli dengan kami, sebaliknya harga jatuh. Contohnya, harga sawi masih dalam lingkungan RM1.30 hingga RM1.40 sekilogram. Kalau jual mahal nanti, mereka akan ambil sedikit," katanya kepada *BH*, semalam.

Ramli berkata, beliau tidak bersetuju bahawa kekurangan bekalan import adalah punca harga



Sayuran yang dibuang ketika pelaksanaan PKP.

sayur naik di pasaran tempatan.

Sebagai pemain industri, beliau mendakwa punca utama harga sayur naik adalah campur tangan kartel orang tengah dalam sistem rantaian bekalan sayur-sayuran negara.

Selain itu, katanya, tiada kawalan yang cekap oleh pihak berkuasa dalam pemantauan jualan termasuk penjualan baja serta bahan pertanian terlalu tinggi punca kenaikan harga sayur.

"Bekalan sayur yang dihasilkan pekebun tempatan ada, malah banyak. Ada ketika tiada permintaan sayur seperti kangkung dan bayam, saya beri percuma atau menyumbangkan sehingga 1.2 tan sayur kepada golongan memerlukan daripada dibuang atau dibiarkan rosak," katanya.

Pekebun sayur tanah rendah di Bukit Beruntung, Roslee Baharudin, pula berkata beliau menjual cili padi dan limau kasturi kepada

pemborong pada harga yang dianggapnya masih murah meskipun sukar menjual hasil pertanian dalam tempoh PKP.

Beliau berkata, harga hasil tani yang dijual kepada pemborong sukar untuk dinaikkan malah mengakui terpaksa menurunkan harga bagi memastikan cili padi dan limau kasturi yang dihasilkan di ladangnya dapat terjual.

"Harga sebenarnya turun tetapi nak naik payah. Pemborong apabila mereka nak berurusan dengan kita, mereka selalu membandingkan harga dengan pekebun lain yang boleh beri harga lagi murah dan sebagainya. Nak tak nak, saya kena jual."

"Saya jual cili padi kepada pemborong pada harga RM6 hingga RM8 sekilogram. Saya lihat ia dijual di pasaran sekarang pada harga antara RM20 hingga RM30 sekilogram."

"Limau kasturi pula saya jual pada harga antara 50 sen hingga

60 sen sekilogram. Kalau harga di pasaran dalam RM1.50 hingga RM3 sekilogram.

"Kita kalah kerana apabila harga hasil tani rendah, kita terpaksa kena jual juga. Ditambah pula termasuk sayur import, terus 'bunuh' kita," katanya.

Pemilik kebun sayur di Tanjung Malim, Chai Kean Seong, berkata harga sayur yang dijual daripada pekebun kepada pemborong tidak naik mendadak dan sekiranya berlaku kenaikan sekalipun ia tidak ketara, malah dilihat lebih menguntungkan pemborong dan penjual.

"Mana ada harga naik. Mana boleh naik sesuka hati."

"Harga tinun pun 40 sen sekilogram, petola RM2 hingga RM2.50 sekilogram dan kacang panjang RM5 sekilogram. Harga waktu PKP pun lebih kurang sahaja (sebelum PKP)."

"Walaupun harga murah, terpaksa jual juga untuk cari makan dan bayar gaji pekerja," katanya.



Saya jual cili padi kepada pemborong pada harga RM6 hingga RM8 sekilogram. Saya lihat ia dijual di pasaran sekarang pada harga antara RM20 hingga RM30 sekilogram.

Roslee Baharudin,
Pekebun



Walaupun harga naik sekalipun, kami kena ikut harga sampai habis tempoh kontrak. Pekebun seperti kami terhimpit, tetapi di sebelah pemborong dan penjual, paling untung.

Ramli Mohd Nasir,
Pekebun



10 FEB, 2021

'Orang tengah kawal harga sayur'

Berita Harian, Malaysia

Page 2 of 2

SUMMARIES

Pekebun dakwa pemborong, penjual kaut untung besar

Kuala Lumpur: Walaupun harga sayur di pasaran dikatakan melonjak tinggi, ia cuma menguntungkan 'orang tengah' dan bukannya pekebun secara keseluruhan. Beberapa pekebun sayur tanah rendah mendakwa pihak pemborong termasuk penjual adalah golongan yang 'ada kuasa' untuk mengawal harga di pasaran tempatan, terutama di pasar borong.